

## **KONTROL MOZIOA**

### **PANDEMIA TESTUINGURUAN GAZTEEI ZUZENDUTAKO UDAL POLITIKEI BURUZKOA**

Jon Markel Ormazabal Gaztañaga EH Bildu udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2021eko otsailaren 15ean Pertsonentzako Zerbitzuen Batzordean aztertutako interpelazioaren ondorioa da.

## **JUSTIFIKAZIOA**

Pandemia testuinguru honetan, eta batez ere ekainetik aurrerako deskonfinamendu fasearen ondotik, gazteria hizketagai nagusi bilakatu da, bai hedabideetan bai eremu politikoan. “Normaltasun berria” esan zioten horretan, gazteekiko ikuspegi erabat ezkorra gailendu da: arduragabeak, berekoiak, kutsatzaileak, kale-edana (botiloia) egiten dute, arauak ez dituzte betetzen....

Kanpaina asko gazteei zuzenduta egon dira, beraien arduragabekeria erakutsi nahian. Baina ikuspegia, ezkorra izateaz gain, interesatua ere bada. Beste behin ere, batzuek egiten dutena orokortzen da, jakinda ez dutela guztiek egiten eta, bestalde, gazteengan bakarrik ikusten da helduek ere egiten dutena.

2020ko abenduaren 10ean, COVID-19ak hirian eragindako egoerari berriz heltzeko Gizarte Kontseiluak egindako bilkuran, Eneko Goia alkateak adierazi zuen belaunaldien arteko ituna pandemia honen erronka handienetako bat izango dela; izan ere, bere ustez, Donostian belaunaldien arteko urruntze kezkarria gertatzen ari da.

**EH Bildu talde politikoa**

Grupo político EH Bildu

Ijentea, 1 - 20003 Donostia  
Tel. 943481027 eh\_bildu@donostia.eus-- [www.donostia.ehbildu.eus](http://www.donostia.ehbildu.eus) -

Asko hitz egin da gazteek bizi duten egoeraz, baina esan bezala, are eta gehiago hitz egin zenbait gaztek osasun neurrien aurrean hartu dituzten jarrerei buruz, gehienetan gazteak kokatuz gutxi asko osasun larrialdiaren “erantzule” bezala. Donostiako Udal Gobernuko zenbait ordezkariaren hitzartzeak ere norabide berean joan dira. Hau da, belaunaldi arteko lankidetzarako indargunetzat hartu ordez, gazteak edo gazteria gatazkarako esparrutzat hartu dira. Horren adibide da, besteak beste, azken hilabeteotan gure hirian pairatu ditugun kale istiluekin egin den kudeaketa.

Ukaezina da zuzendu beharreko jarrera desagokiak, egon, badaudela. Eta bizi dugun osasun krisiak premiazkoa egiten du horietan esku-hartzea, lehentasunez gainera. Baina, gainontzeko gizarte-taldearen erantzukizunak alde batera utziz, edo are, instituzioen ezintasunak ezkutatu nahian, gizarte talde zehatz bat, kasu honetan gazteria, etengabe salatzeak eta ia kutsatze gehienaren erantzule dela ikusarazteak erantzuna modu defentsiboan jartzea ekartzen du. Gainera, aisialdirako espazioak ixten zaizkie, hala nola, kirol espazioak, igerilekuak, parkeak eta abar. Otsaileko Pertsonentzako Zerbitzuen batzordean, pandemia testuinguru honetan Donostiako gazteei zuzendutako berariazko ekinbide edo programarik abiatu ote zen galdetuta, Ane Oyarbide zinegotzi ordezkariak azken urte honetan Udaletik bideratutako hainbat jardueren zerrenda egin zuen. Zerrenda honek, ordea, ez zuen ohiko jardueretatik ezer ezberdinik. Adi berean, eta Donostiaren kasuan nabarmen, gazteei zuzendutako politika publikoak *stand by* egoeran geratu direla dirudi, hiriko Haurtxoko eta Gazte Lekuak 2021eko urtarrilean ireki izanak agerian uzten duen bezala.

Javier Segura del Pozo epidemiologo eta medikuntza komunitarioko adituak 2020ko azaroan argitaratutako artikulu batean zioen, pedagogian gehiago inbertitu beharko genukeela, hau da, “botiloari errua bota beharrean, aisialdirako alternatibak eman beharko genituzke.” Onuragarriagoa litzateke, are beharrezkoa, kontzientziazio-politika bat, belaunaldien arteko itunean oinarritutako arrakala are gehiago ez irekitzea sustatzen duen eredu baten partaide egitea gazteak. Etorkizunean hiriko arkitektura sozial eta politikoaren diseinuaren protagonista izango den kolektibotzat hartzea. Baina, gaur gaurkoz, ez da hori Donostiako Udaletik garatu diren politiken zentzua.

Horregatik guztiarengatik, honako hau da behean sinatzen duen zinegotziak aurkeztutako **KONTROL MOZIOA:**

**EH Bildu talde politikoa**

Grupo político EH Bildu

---

Ijentea, 1 - 20003 Donostia  
Tel. 943481027 eh\_bildu@donostia.eus-- [www.donostia.ehbildu.eus](http://www.donostia.ehbildu.eus) -

- 1.- Donostiako Udaltzarak hertsatuki eskatzen dio Udal Gobernuari ez dezala sustatu, zuzenean edo zeharka, belaunaldien arteko arrakala sakondu dezaketen diskurtso, praktika eta politiketan.
- 2.- Donostiako Udaltzarak hertsatuki eskatzen dio Udal Gobernuari pandemia testuinguru honetan Donostiako gazteei zuzendutako berariazko ekinbide edo programak sortu eta garatzea, aisialdirako nahiz beraien garapenerako funtsezkoak diren eremuetan arreta jarritz, eta beti ere gazteak hiriko arkitektura sozial eta politikoaren diseinuaren protagonista izango den kolektibotzat hartuz

Donostian, 2021ko otsailaren 19an

Jon Markel Ormazabal Gaztañaga  
**EH Bildu udal taldeko zinegotzia**